

Bosna i Hercegovina
Federacija Bosne i Hercegovine
Kanton Sarajevo
Općina Novo Sarajevo
Općinsko vijeće Novo Sarajevo
n/r predsjedavajući, Robert Pleše

PREDMET: VIJEĆNIČKA INICIJATIVA

Poštovani_e,

Na osnovu člana 22. Poslovnika Općinskog vijeća Novo Sarajevo kojim se propisuje pravo vijećnika da podnosi inicijative, koje se odnose na rad Općinskog načelnika i službi za upravu u izvršavanju zakona, drugih propisa i općih akata Općinskog vijeća, kao i na rad institucija koje imaju javna ovlaštenja, upućujem vijećničku inicijativu za **ustupanje prostora Općine Novo Sarajevo Gradskom simfonijskom orkestru.**

O B R A Z L O Ž E N J E:

Gradski simfonijski orkestar od 2019. godine pokušava oživjeti kulturu scenu u Sarajevu, ali i biti okruženje za napredak mladih muzičara i muzičarki. Obratili su mi se sa problemom prostora za vježbanje, u čemu im može pomoći Općina Novo Sarajevo. U zamjenu za prostor, Orkestar je spreman svoj rad prezentovati na ulicama Novog Sarajeva, što bi poboljšalo kulturnu ponudu u Novom Sarajevu. Detalji saradnje se mogu definisati na sastanku, a lokacije sale koje bi njima odgovarale se, siguran sam, mogu pronaći u Centru za mlade i odladinu ili u Dječijoj kući.

O orkestru i značaju ovog orkestra:

Gradski simfonijski orkestar ideja je koja okuplja prvenstveno mlade muzičare iz Sarajeva i Bosne i Hercegovine, ali i iz susjednih zemalja, a koji su svojim djelovanjem vezani za Sarajevo. Nastala je još u aprilu 2019. godine, ali je zbog nedostatka institucionalne podrške svu svoju kreativnu energiju trošila isključivo na sami opstanak. Ideja o gradskom orkestru, nastala je s ciljem da se ukaže na važnost postojanja ansambla ovog tipa, kao prostora gdje mladi muzičari mogu dobiti iskustvo sviranja u profesionalnoj sredini, svirati stilski raznolik repertoar, te obogatiti već stečena znanja. Nadalje, cilj orkestra je da ukazuje na važnost umjetničke muzike u savremenom društvu i njenog adekvatnog vrednovanja, ali i na nedostatak odgovarajuće infrastrukture koja bi podržala rad i djelovanje profesionalnih muzičara u Sarajevu.

U državi u kojoj još uvijek imamo samo jedan profesionalni orkestar (Orkestar Sarajevske filharmonije), koji mladima nudi profesionalni angažman u smislu bavljenja izvođaštvom za koje se i obrazujemo, nepotrebno je govoriti o nizu negativnih efekata kakve ovakvo ustrojstvo ima naročito po mladi talentovani kadar – deterioracija umjetničke scene, doprinos odlivu mozgova, neadekvatno očuvanje kulturne baštine naroda BiH, te generalno nemogućnost da se stvaraju novi umjetnički (kulturni) *outputi* u onoj mjeri u kojoj se stvaraju u Zapadnoj Evropi i svijetu, što znači da naša muzička kultura i umjetnost ne evoluiraju, nego su zaglavljene u labirintu bez izlaza.

Pored instrumentalista, u orkestru mjesto imaju i mladi dirigenti, muzikolozi, menadžeri, tim za odnose s javnošću, arhivar, itd. Ovaj projekat njeguje mlade profesionalce na početku njihovih karijera i priprema ih za dalje napredovanje. Ova grupa mladih ljudi odlučila je na sebe preuzeti odgovornost pripreme mladih umjetnika za njihove buduće profesionalne angažmane, pa bi gradski orkestar imao ulogu svojevrsnog mosta između akademskog obrazovanja i profesionalnog bavljenja umjetnošću. Smatramo da samo zajedničkim naporom akademske zajednice, institucija kulture i umjetnosti, različitih nivoa administracije i profesionalne zajednice možemo uspješno očuvati i razvijati naše kulturu i umjetnost. Ovo će biti naročito važno u periodu post-pandemijske rekonstrukcije kulturnog života grada Sarajeva, za kojeg smatramo da bi trebao biti osnovni identifikacioni faktor modernog građanina našeg Sarajeva i Bosne i Hercegovine!

Orkestar, tada pod imenom Kamerni orkestar mladih, svoj debitantski nastup imao je u novembru 2019. godine, kada je nastupio na jubilarnom autorskom koncertu Vojislava Ivanovića u okviru festivala Guitar United Fest 2019. godine, a kada je ubrao simpatije i drugih izvođača i publike. Orkestar djeluje pod dirigentskom palicom svog rezidentnog dirigenta i menadžera, Fuada Šetića.

Ahmed Kosovac
Klub vijećnika_ca Naše stranke

Sarajevo, 29.07.2021.